

Koe gazaxo ke fent

Koe lentef nael, Arktika welfa tir datafa opranafa bira lokon besana gan opruk ; ewala tigid, dum sibirafa tursia isu kanadafa is Nunaata tisa tela logijafa ewala ke tamava. Arktika wale lentefa pakawa ke Europa is Asia is Amerika tigur ; bat tadavaf seg va arktikafu naelafu ivamu koanamar ise va naelafa lenteka anamezar.

Icle tandeon, awaltara dun dur. Fentugalaf miel tir abrotcipaf, afiz telapaf : voluca remi idulugal. Koe dye nael, to ant tanoy mielcek az tanoy afizek tandeon tid, ise tevakston jidad !

Fentafa wegona. Sulemeem ke bata golapa va nustaf lidawickaf gropeem goliker, i va gropeem adalaf gu yanka yanka (tulon koe Verxoyansk koe ronefa Sibira, yanka vas -68° zo koverteyer) is muvarekama. Toloya patectoyinda vadjed. Taneafa tir vaf tapanaf mit nume tankomapafa. Toleafa tir loon gedrafa kiren sid tir kev ranton muta is dem ruxeem. Voxen larde sidom remi tanda dun gutapawer (tapsid), pune aal koe anton zeitaf zo atrid. Koe datafa *taiga* aala dem pailltapale, aal ontinon somevonedew, isen ontine ke telyon ke ruga loon lenteon tir vas anton 30 ik 40 cm-. Pinaf ruxeem ton lotaneakaf tatz (berdava is abic tij) koe loplabafa gola anton atrir.

Jonksevafa werda. Fentugalon, werd is luc leve nolda ke kretsiskafa is letafa ruga lajublid. Voxen bak liaf arktikaf idulugal (toloy ik baroy aksat) moion levgon, ant welmefa bada ke sid gritaped. Abicedje ruxa wonewed ise imwed : va ksevafa edaveracka tcoekt edje kadulafa ok raitadukafa dekumpa is suzitca is batakaf vibong rumbed. Enga ke aejada va kerafa kretsca zovdad isen lesokoraf onduk ke zelimo vas kiltatum vektad. Voxen ruxinda lajuzaleyesa gu lugavaf gropeem ke naelafa lenteka vugote tid. Batdume ruxeem tir copaf : moe Devon ewala (Kanada), anton mon 100 imwaruxinda krulded, solve mon 4200 koe Franca tid !

Loote lamasi. Opranafa welfa tir tel lovolluvedad patectoy ke naelafa lenteka. Kore tir ind ke batakaf rupol is megol is spedol is kabay voxis dat niskiskaf sulem isu tavomo tadleso va spol. Neken meki zveri banlize elupkon blir isen mek esidayaf moukol zo kakever. Ruga idulugalon kapbureon tir blisu viaku. Kore moukol abicote tid voxen lanyona katca dum tovukol tid dem jontik olkik. Zveri ropatani vas yona celema cugote tid lamasi ise abdi fentugal maltalad aze va solumapa vas jontikviele yone decitoye tatre kal luvedafa coyunta rentalad.

Ant abica katca dum gijafa razama is bugimoda is lanyona libakolinda luzikon lajoremblid. Darpeen geon, katcota laumar : bar-sanoyca katca moe geefa ewala ke Novaya Zemlya (valente Rossia) az tev-sanboraya koe aalafa ruga ke tadava. Taiga aala vas lokulaf sulemeem luexon ruldar kiren lidawicka tir leon plabafa : profanafa gu moukol (sebadadunolam is vimkol is konaka vesnolinda) is jontik atelatorik (branoli is brunlot is djenol is idatcol) is werdtorik (bedakol is wocol is cpogol).

Idulon koe nolda. Sulem ke naelafa lenteka katcalon tid kalvekaf gu anameda lize blid. Nustuca ke fentugal vebar da debilitafa katca gu fent va int konakkane gonendad. Batdume koe taiga aala, lambey is nitca va fentugalaf miel arte erlit suxayan koe nolda bravon ice suka is tap tiskid. Tire valeve nolda vafa vas 10 cm-, yanka tir vas 5 ik 20° loeke dam tela diveon. Konaka ciestinda milinde askid, voxis lanyona proklaminda inton kosuxedayasa ko nolda liz tod goa arti sanoy ok tol-sanoy verast griawid !

Gevasa betawera. Koe naelafa lenteka, kseva dun betawed, dum jijacek ke afiz. Muvugalon, sulem va likera va fentugal egadad ; im ke moukol ok bruxeem ke zveri tuabrotcawer is tuekamawer. Naelaf bresitol is branoli is libakol is bedakol ba taneafa tapara vanpid ton aftapaf im. Volson idulugalon, inafa beretrafa ok flemafa jadifa uka gu tela ke sinafu rubaxo loon zo dojer.

Lyumara ta bli. Voldum rotisa folira, abic moukol koe naelafa lenteka fentugalud. Vaxe vesnol ke taiga aala, ant arktikaf werpol (Spermophilus) blis koe Kanada gitwerier, dum bilotol ke meftava. Arak ke moukoleem tuke vaf myot is sumafa bada va fent divvawar oke blison valeve nolda milinde tovukol sokaskir.

Nekev plabapaf gropeem nope noaf is duref fent, sulem is ruxa ke naelafa lenteka lajuremblid ise tandeon nazbalked. Sinafe tame vas opranof letaxo ok felkus blatak vektar. Voxen kota katca al anamraver kane va rodadin robeem gomalsaver kore rob enwe abicote tid.

